



## **NOVOS ESTATUTOS DA ASOCIACIÓN: SOCIEDADE GALEGA DE SEXOLOXÍA (adaptados á Lei Orgánica 1/2002)**

### **CAPITULO I. DA ASOCIACIÓN EN XERAL**

Artigo 1.- Coa denominación Sociedade Galega de Sexoloxía constitúese unha ASOCIACIÓN ó amparo da Ley Orgánica 1/2002, de 22 de Marzo, e normas complementarias, con capacidade xurídica e plena capacidade de obrar, carecendo de ánimo de lucro.

Artigo 2.- Esta asociación constitúese por tempo indefinido.


Artigo 3.- Son fins principais da Asociación: potenciar e promocionar seminarios, congresos, conferencias e cursos que axuden á formación continua dos profesionais da Sexoloxía en calquera dos seus campos.

Artigo 4.- Para o cumprimento destes fins realizaranse as seguintes actividades:

- a) Dinamización dun espazo de encontro.
- b) Organización de actividades socio-culturais/deportivas/lúdicas/etc.
- c) Organización de cursos, seminarios, conferencias e actos análogos.
- d) Elaboración e edición de materiais formativos, revistas, folletos e calquera outro tipo de publicación para a difusión das ideas da asociación.
- e) Deseño e execución de cantas accións ou actividades sexan precisas para conseguirla participación de asociados/destinatarios.
- f) Fomento das relacións de colaboración con institucións públicas, empresas privadas e organizacións non lucrativas que permitan un maior cumprimento dos fins fundacionais.
- g) Calquera outra actividade que a Xunta Directiva considere axeitada para o cumprimento dos fins da asociación.

Artigo 5.- O domicilio social da Asociación radicará na localidade de Pontevedra, Avenida de Vigo 25 – 4ºE, código postal: 36003, da provincia de Pontevedra. Poderanse empregar outros locais asociativos mediante acordo da Xunta Directiva.

Artigo 6.- A asociación en función dos seus fins e da ubicación do seu domicilio social, exercerá fundamentalmente as súas actividades no ámbito da Comunidade Autónoma de Galicia.



## **CAPITULO II. DOS/DAS ASOCIADOS/AS**

Artigo 7.- Poderá ser integrante da Asociación toda persoa con maioría de idade que acate os fins e os estatutos da Asociación. Adquirise a condición de asociado (socio) ó traveso dunha solicitude formal dirixida á Xunta Directiva que resolverá cada unha das solicitudes.

Todos os asociados (socios) teñen dereito a formar parte da Asamblea Xeral con voz e voto e teñen a posibilidade de seren deseñados membros da Xunta Directiva; solicitar axuda ou apoio da Asociación en calquera dos temas referentes aos fins da Asociación. Tamén teñen dereito a seren ouvidos cando se lles impute infraccións dos Estatutos, denantes a tomar ningún acordo en contra.

Os asociados terán a obriga de respetar e cumprir os Estatutos e pagar a cota reglamentaria decidida pola Asamblea.

Artigo 8.- A condición de asociado/a pérdese por causa de:

- a) Renuncia voluntaria
- b) Por separación acordada pola Asamblea Xeral, por infracción dos Estatutos.

Artigo 9.- A expulsión de persoas asociadas será acordado pola Xunta Directiva, previa audiencia do interesado/a. En todo caso, o acordo da expulsión deberá ser ratificado pola Asamblea Xeral e contra del pódese recorrer diante da xurisdicción ordinaria.

Artigo 10.- A separación temporal dun/dunha asociado/a pódese producir:

- a) A petición persoal do/da asociado/a por escrito.
- b) Polo acordo da Xunta Directiva, ben por motivos de ter aberto un expediente sancionador, ben polo impagamento das cotas, ben por comportamentos que afecten á boa marcha dalgún dos fins da Asociación.

Artigo 11.- No seo da Asociación poden convivi-las seguintes clases de asociados/as:

- a) Socios/as fundadores, que serán aqueles que participen no acto da constitución da Asociación.
- b) Socios/as de número, que serán os que ingresen despois da constitución da Asociación.

Opcionalmente pódense incorporar:

- c) Socios/as de honra, que destacan a criterio da Asamblea Xeral (ou se se establece na Xunta Directiva) polo seu prestixio ou por ter contribuído ó desenvolvemento dos fins fundacionais.
- d) Outros tipos de socios/a: socio/as infantís (menores de 18 anos), socios/as benefactores, socios/as simpatizantes, etc.

Artigo 12.- Os/as socios/as de número e fundadores teñen os seguintes dereitos:



- 1) Tomar parte en calquera actividade que a Asociación organice en cumprimento dos seus fins.
- 2) Beneficiarse de tódalas vantaxes que a Asociación poida proporcionar.
- 3) Participar nas Asambleas, con voz e voto así como ser elector e/ou elixible para os cargos directivos.
- 4) Recibir información sobre os acordos tomados polos órganos da Asociación, así como sobre a información máis salientable da planificación e do orzamento e as súas respectivas execucións.
- 5) Facer suxestións ós membros da Xunta Directiva en orde a mellora-lo cumprimento dos fins da Asociación.
- 6) Aqueles outros que sexan recollidos na lexislación vixente.

Artigo 13.- Os/as socios/as de número e fundadores teñen as seguintes obrigas:

- 1) Cumpri-los presentes Estatutos e os acordos válidos das Asambleas e da Xunta Directiva.
- 2) Prestar cantos servicios determinen os Estatutos, o regulamento de Réxime Interno e os acordos das Asambleas Xerais.
- 3) Asistir ás Asambleas Xerais.
- 4) Desenvolve-las obrigas inherentes ó cargo que se ocupe.
- 5) Satisface-las cotas ordinarias (e/ou cotas de entrada) que se establezan por Asamblea.
- 6) Observar unha boa conducta cívica.
- 7) Aquelas outras que sexan recollidas na lexislación vixente.

Artigo 14.- Os/as socios/as de honra (e outros, se procede) terán as mesmas obrigas que os/as socios/as fundadores e de número.


### **CAPITULO III. DO FUNCIONAMIENTO ASOCIATIVO**

#### **RÉXIME XERAL**

Artigo 15.- A asociación rexerese segundo os presentes Estatutos sempre, que os seus contidos non se opoñan ás leis nin contradigan os principios contidos na Ley Orgánica 1/2002 e o seu desenvolvemento regulamentario.

Artigo 16.- O goberno e a representación da Asociación están a cargo dos seguintes órganos:

- a) A Asamblea Xeral, como máximo órgano colexiado de goberno da Asociación.
- b) A Xunta Directiva, como órgano colexiado en quen a Asamblea delega o goberno permanente da Asociación.
- c) O Presidente/a, o Vicepresidente/a, o Secretario/a e o Tesoreiro/a, como órganos unipersoais e con funcións de goberno e de representación determinadas polos Estatutos.



## **ASAMBLEA XERAL**

Artigo 17.- A Asamblea Xeral é o órgano de expresión da vontade da Asociación, estará integrada por tódolos/as asociados/as (con dereito a voto, se procede) e tomará os seus acordos polo principio maioritario ou de democracia interna. O Presidente/a e os Secretario/a da Asemblea serán os mesmos que os da Xunta Directiva (opcional).

Artigo 18.- A Asamblea Xeral reunirse con carácter ordinario como mínimo unha vez ó ano e con carácter extraordinario cantas veces o acorde a Xunta Directiva o considere o/a Presidente/a ou o soliciten o 10% dos/das socios/as. Neste último caso realizarase por medio de escrito dirixido ó Presidente/a, autorizado coas firmas dos solicitantes, no que se expoña o motivo da convocatoria e a orde do día.

Artigo 19.- A Asamblea Xeral ordinaria reunirse necesariamente dentro dos 3 meses seguintes ó peche do exercicio.

Tanto a Asamblea Ordinaria como a Extraordinaria serán convocadas con 15 días de antelación polo Presidente/a da Xunta Directiva, enviándose a notificación ó domicilio dos/das asociados/as.

Na convocatoria han de aparecer o lugar, data e hora da xuntanza, así como a orde do día con expresión concreta dos temas a tratar e os anexos que procedan. Tamén han de sinalarse a hora da segunda convocatoria, que como mínimo terá que separarse media hora da primeira convocatoria.

Artigo 20.- Para que as Assembleas poidan tomar acordos, integranse polos/as asociados/as asistentes, sempre que concorran un tercio do total dos/das asociados/as con dereito a voto na primeira convocatoria ou, pasado o prazo estipulado con calquera número de asociados/as con dereito a voto en segunda convocatoria.

Artigo 21.- Os/as socios/as poderán outorga-la súa representación, ós efectos de asistir ás Assembleas Xerais, en calquera outro/a socio/a. Tal representación outorgarse por escrito, e deberá obrar en poder do Secretario/a da Asamblea polo menos media hora antes de celebrarse a sesión.

Artigo 22.- Son competencias da Asamblea Xeral Ordinaria:

- a) Aproba-lo Plan de actuación proposto pola Xunta Directiva, así como examinar e aproba-la Memoria de xestión correspondente.
- b) Aproba-lo Orzamento proposto pola Xunta Directiva, así como examinar e aproba-los Balances e as Contas anuais do exercicio anterior.
- c) Fixa-las cotas ordinarias e/ou extraordinarias.
- d) Aproba-lo Regulamento de Réxime Interno da Asociación.
- e) As demais que resulten dos Estatutos en non estean expresamente atribuídas á Asamblea Xeral Extraordinaria ou á Xunta Directiva.



Artigo 23.- Son competencias da Asamblea Xeral Extraordinaria:

- a) Elixi-los integrantes da Xunta Directiva.
- b) Aproba-la federación con outras asociacións.
- c) Modifica-los Estatutos da Asociación.
- d) Disolve-la Asociación e designa-los liquidadores.
- e) Expulsar a socios/as, a proposta da Xunta Directiva.
- f) Autoriza-lo alleamento, gravame ou hipoteca de bens sociais.
- g) Socilita-la declaración de Asociación de Utilidade Pública.

Artigo 24.- Os acordos tomaranse por maioría simple das persoas presentes ou representadas cando os votos afirmativos superen ós negativos, non sendo computables os votos en branco nin as abstencións. Será preciso maioría cualificada das persoas presentes ou representadas, que resultará cando os votos afirmativos superen a metade destas, para os apartados comprendidos entre o b) e o g) do artigo 23. A continuación levaranse os acordos ó Libro de Actas e asinará o/a Presidente/a e o Secretario/a da Asemblea. A acta deberá ser lida na seguinte sesión celebrada pola Asamblea Xeral e aprobada por maioría simple.

Artigo 25.- Os acordos que vaian en contra desde Estatutos ou dos fins da Asociación poderán ser recorridos en reposición diante da Asamblea Xeral. A partir da resolución do recurso de reposición quedará aberta a vía para recorrer dainte da xurisdicción ordinaria.

## **XUNTA DIRECTIVA**

Artigo 26.- A Asociación será xestionada e representada por unha Xunta Directiva formada polos cargos de: Presidente/a, Vicepresidente/a, Secretario/a, Tesoureiro/a e Vocais.

Os cargos serán designados e revocados pola Asamblea Xeral Extraordinaria e o seu mandato terá unha duración de 3 anos, podendo ser reeleixidos ó final do seu mandato.

Artigo 27.- Os cargos da Xunta Directiva poderán causar baixa por renuncia voluntaria comunicada por escrito á Xunta Directiva, por incumprimento das obrigas que tiveran encomendadas e/ou por expiración do mandato. Neste último caso, continuarán no seus cargos ata o momento no que se produza a aceptación de quen os substitúan.

Artigo 28.- As vacantes que se pudieran producir na Xunta Directiva cubriranse provisionalmente por designación da mesma ata que a Asamblea Xeral elixa os novos membros ou confirme nos seus postos ós designados.

Artigo 29.- A Xunta Directiva reunirase con carácter ordinario unha vez ó trimestre e con carácter extraordinario cantas veces como determine o Presidente/a ou a petición de tres dos seus membros.

A convocatoria realizarase como mínimo con tres días de antelación mediante a citación persoal na que se recollerá a orden do día. No caso de ausencia



inxustificada de calquera membro da Xunta Directiva por tres veces consecutivas procederáse á súa destitución.

A Xunta Directiva quedará constituída cando asista a metade máis un dos seus membros e para que os seus acordos sexan válidos deberán ser tomados por maioría de votos. No caso de empate, o voto do/a Presidente será de calidade.

Artigo 30.- As facultades da Xunta Directiva estenderanse, con carácter xeral, a tódolos actos propios das finalidades da asociación, sempre que non requiran, segundo estes Estatutos, autorización expresa da Asamblea Xeral. En particular son facultades da Xunta Directiva:


- a) Dirixilas actividades sociais e leva-la xestión económica e administrativa da Asociación, acordando realizalos oportunos contratos e actos.
- b) Convoca-las Assembleas Xerais e executa-os acordos nela acordados.
- c) Formular e someter a aprobación da Asamblea Xeral o Plan de actuación proposto pola Xunta Directiva, así como a Memoria de xestión correspondente.
- d) Formular e someter á aprobación da Asamblea Xeral o Orzamento do exercicio, así como os Balances e as Contas anuais do exercicio pechado.
- e) Resolver sobre a admisión de novos asociados.
- f) Crear Comisións de traballo co fin de delegar nelas a preparación de determinados actos ou designarase un membro da Xunta Directiva.
- g) Nomear delegados para determinadas actividades da Asociación.
- h) Interpreta-los Estatutos e o Regulamento de Réxime Interno e velar polo seu cumprimento.
- i) Dictar normas de funcionamento non contempladas no Regulamento de Réxime Interno.
- j) Calquera outra facultade que non sexa da exclusiva competencia da Asamblea Xeral de socios.

## **ORGANOS UNIPERSOAIS**

Artigo 31.- O/A Presidente/a terá as seguintes atribucións:

- a) Ostenta-la dirección da Asociación velando polo cumprimento dos seus fins.
- b) Representar legalmente á Asociación ante toda clase de organismos públicos ou privados.
- c) Convocar, presidir e levanta-las sesións da Asamblea Xeral e da Xunta Directiva, así como dirixi-las deliberacións que nelas se produzan.
- d) Ordenar pagos e autorizar coa súa firma os documentos, actas, certificación e correspondencia.
- e) Adoptar calquera medida urgente que a boa marcha da Asociación aconselle o no desenrolo das súas actividades resulte necesaria ou convinte, sen prexuízo de dar conta posteriormente á Xunta Directiva.

Artigo 32.- O/A Vicepresidente/a asumirá as funcións que nelas delegue o/a Presidente/a substituíndoo en caso de vacante, ausencia ou enfermidade.



Artigo 33.- O/A Secretario/a terá as seguintes atribucións:

- a) Ostenta-la dirección dos traballos administrativos da Asociación.
- b) Custodiar e leva-los libros de actas e de rexistro de socios/as, documentos e selos da Asociación.
- c) Estende-las convocatorias e as actas das reunións ademais de expedir certificacións das memos co visto bo do Presidente/a.
- d) Comunicación sobre designación de Xuntas Directivas e demais acordos sociais inscribibles ós Rexistros correspondentes, así como a presentación das contas anuais e o cumprimento das obrigacións documentais nos termos que legalmente correspondan.

Artigo 33.- O/A Tesoureiro/a terá as seguintes atribucións:

- a) Ostenta-la dirección dos traballos de xestión económica da Asociación.
- b) Custodiar e leva-los libros de contabilidade e inventarios así como tódolos documentos económicos necesarios para a elaboración das contas e balances.
- c) Prepara-los Orzamentos, as Contas anuais e os Balances para a súa presentación diante da Xunta Directiva e da Asamblea Xeral.
- d) Recardar e custodia-los fondos pertencentes á Asociación.
- e) Dar cumprimento ás ordes de pago que expida o/a Presidente/a.

Artigo 34.- Os vocais terán as obrigas propias do seu cargo como membros da Xunta Directiva, así coma as que nazan das delegacións ou comisións de traballo que a propia Xunta encomende.

## **RÉXIME ECONÓMICO**


Artigo 35.- A Asociación é unha entidade sen ánimo de lucro. Os posibles beneficios obtidos como consecuencia da súas actividades económicas, incluídas ás presentacións de servicios, deberán destinarse exclusivamente, ó cumprimento do seus fins.

Artigo 36.- O Patrimonio da Asociación coincide co recollido nas contas aprobadas anualmente: 1.055 €.

Artigo 37.- O exercicio asociativo e económico será anual e o seu peche terá lugar o 31 de Decembro de cada ano.

Artigo 38.- O Orzamento da Asociación será anual, tendo que ser aprobado na Asamblea Xeral Ordinaria de inicio do exercicio. Asemade, a liquidación do Orzamento terá que ser presentada na Asamblea Xeral Ordinaria inmediatamente posterior ó remate do exercicio.

Artigo 39.- Anualmente e con referencia ó último día do exercicio económico de cada ano, practicarase o inventario e balance de situación, que se formalizará



nunha memoria e será posta a disposición dos/as socios/as, durante un prazo non inferior a quince días ó sinalado para a celebración da Asemblea Xeral Ordinaria, que deberá aprobalo ou censuralo.

Artigo 40.- Os recursos económicos previstos para o desenvolvemento dos fins e actividades da Asociación será os seguintes:

- a) As cotas ordinarias dos/as asociados/as, que en ningún caso serán reintegrables.
- b) As cotas extraordinarias que propoña a Xunta Directiva e sexan aprobadas pola Asemblea.
- c) As doazóns ou subvencións que pidan conceder órganos públicos, entidades privadas ou particulares.
- d) Os ingresos que se poidan recibir polo desenvolvemento das actividades da asociación.
- e) As chegadas voluntarias, que se considerarán como préstamos sen xuros, reintegrables nos termos que se pacten.
- f) Calquera outro recurso lícito.

Artigo 41.- Para a disposición de fondos das entidades bancarias onde a Asociación teña depositadas os mesmos, deberán ter recoñecidas as firmas: o/a Presidente/a, o/a Vicepresidente/a e o/a Tesoureiro/a, para o emprego conxunto delas.

Artigo 42.- A disposición dos bens patrimoniais que se aproben regulamentariamente, han de ser aprobados pola Asemblea Xeral.

#### **CAPITULO IV. DA MODIFICACIÓN DE ESTATUTOS E DISOLUCIÓN**

Artigo 43.- Os presentes Estatutos poderán ser modificados a proposta da Xunta Directiva ou un cuarto dos/das asociados/as.


A convocatoria da Asemblea Xeral Extraordinaria terá a modificación dos Estatutos como único punto da orde do día e estará acompañada do texto coas modificacións propostas, abríndose un prazo de 10 días para que calquera socio/a poida dirixir á Xunta Directiva as propostas e emendas que estime oportunas. Estas complementarán a documentación da citada Asemblea e serán postas a disposición cunha antelación mínima de 3 días á realización da mesma.

Artigo 44.- A Asociación disolverase polas seguintes causas:

- a) Pola vontade dos asociados/as acordada pola maioría cualificada das persoas presentes ou representadas.
- b) Por outras causas determinadas legalmente.
- c) Por sentenza xudicial.

Artigo 45.- Acordada a disolución, a Asemblea Xeral Extraordinaria designará dous asociados/as liquidadores, que xunto o/a Presidente/a e o/a Tesoureiro/a,





procederán a efectúa-la liquidación dos bens, pagando débedas, cobrando créditos e fixando o haber líquido resultante.

O haber líquido resultante, unha vez efectuada a liquidación, doarase a outra entidade de carácter non lucrativo, inscrita na Comunidade Autónoma e que teña os mesmos ou similares fins ós desta Asociación.

O xustificante da doazón será presentado no Rexistro da Asociación correspondente para proceder á inscrición da disolución da Asociación.

